

## Ekwo-ozì, Jiudu Deru

<sup>1</sup> Ekwo-ozì-a bẹ shi l'ẹka mbẹdua, bụ Jiudu; onye l'ejeru Jizọsu Kéreshi ozi; bụkwarupho nwune Jiemusu. Ndu mu ede iya anụ bụ ndu ono, Chileke kuru bya emee ẹphe buru ndu nkiya ono. Chileke ono, bụ Nna bẹ yeru unu obu; bya akwakọbe unu l'ime Jizọsu Kéreshi g'ọ tọ dụ iphe, e-me unu.

<sup>2</sup> Gẹ Chileke phụkwaaru unu obu-imemini; l'oomee g'ẹhu dụ unu guu; l'ooyekwaaphọ unu obu. G'ọ tọko iphe ono meeru unu; mbụ meeru iya unu k'anyinyi.

### *Ndu ẹjo nzi*

<sup>3</sup> Ndu mu yeru obu; iphe, mu shi arị lẹ mu e-deru unu l'ẹkwo-ozì-a bụ k'adzọta ono, Chileke dzọtaru anyi g'anyi ha ono. Ọ gbẹ bya akachia ree lẹ mu e-dechia ya gude dọ unu obu; g'unu bya awata agbaru ekweta ono ọdzori; mbụ ekweta ono e yeru ndu-nsọ kẹ Chileke l'ẹka ono.

<sup>4</sup> Iphe, mu gude epfu iya bụ l'ọ haru nweru ndu ta akwabẹdu Chileke ùbvù, tọru nwẹhu pyobata l'echilabọ unu; ẹbe a madu. Ẹphe anọduje ezi l'ọ dọ ree gẹ nemadzu meje umere, rehuru erehu; eshinu Chileke bụwanu onye emeje eze-iphe-oma. Ẹphe nọdu ajikaje Jizọsu Kéreshi ono, bụ iya bụ Nnajiuphu anyi kpoloko; bya abụkwaru iya phọ kpoloko kpẹekpu bụ onye gude ndzu

anyi. Lẹ teke ndiche bẹ e dehaakwaru iya rọ l'ẹkwo-opfu Chileke sù lẹ Chileke a-nma phẹ ikpe iphe ono, ẹphe eme ono.

<sup>5</sup> Iphemiphe-a bẹ unu makotabebahaakwaru rengurengu; ọle iphe, mu emelepho gẹ mu nyataru unu bu lẹ teke ndiche bẹ Nnajiuphu dzokwaru ndu nkiya teke ono, ẹphe shi buru l'alì Ijiputu ono. O meru ẹphe wufuta l'alì ono. Ọle ọ dzochakwaaru phẹ ono; e mechaēlaa; o gbushiēlaa ndu ophu ekwedu nkiya <sup>6</sup> Teme unwu-ojozi-imigwe ono g'ẹphe ha; mbu ndu ophu, kwefuru ike l'ẹphe taa nopyabedu l'ẹka Chileke doberu phẹ g'ẹphe nodu; bya agbado ẹka a suru g'ẹphe buru l'imigwe bẹ Chileke tukwaru mkporo mgbe-abvu-abvu; chiru phẹ ye l'ejo ochii ẹka gbahuru tsukiribaa. O buru ẹka ono bẹ ẹphe a-nodu jasù l'oke mboku ono, bu mboku, Chileke e-kpe phẹ mpfugbu ono.

<sup>7</sup> Nokwapho g'ọ nwuru Sodomu yee Gomora; mewaro iphe, bukpo mkpukpu lẹ mkpukpu ono, ẹphe l'ẹphe naru onu-egu ono. Ẹphebedua wokotakarupho onwophe togboru eme ke nwanyi me eme iphe, bukpo ebyi, adudu k'epfufu. A nua phẹ aphu k'ojejeje. Iphe ono buru iphe, Chileke gude alọ ndiphe l'ophu ẹka lẹ nchi.

<sup>8</sup> Sù-a; nokwapho g'ọo-du ndu ono, ezi iphe, abudu okpobe-opfu ono. Ẹphe arwoje nrwo, emeje ẹphe emerwushia onwophe; ndu-ishi nodu aduje phẹ ashì; ẹphe nodu anoduje epfubyishi ndu ono, a ta ahumadu l'enya l'ogbu-nwiiinwii imigwe ono. <sup>9</sup> Epfubyishi ono, ẹphe epfubyishi ndu ono ta adukwa g'ọ ka mma l'ọ

Mayikelu, bu onye-ishi unwu-ojozi l'imigwe turu iya ama ememe. Mbụ lẹ teke ono, Mayikelu ono yẹ Nsetanu turu ẹgo onye a-pata odzu Mosisu ono bẹ Mayikelu 'atukwaru ama ephu Nsetanu iphu; g'e-shi gẹ ya nma iya ikpe. Iphe, o pfuru Nsetanu buẹpho: "G'ọ buru Nnajiuphu a-baru ngu mba." <sup>10</sup> Ndu ono bu iphe, te edoduru phe ẹnya bẹ ẹphe anọduje epfubyishi. Ẹphe du g'anu-egbudu, enwedu egomunggo, buẹpho iphe, agu iya nu bẹ oomajeru; teme o buerupho iphe ono bẹ oomeje. Nokwapho gẹ ndu ono emeje bu ono. Oo iphe, agu phe nu bẹ ẹphe anọduje eme; o buru iya l'e-gbu phe. <sup>11</sup> Nshio phe! Oo ẹjo ọzo ono, Kenu tsoru teke ndiche ono bẹ ẹphe etsokwapho. Mbụ-a; ndu owa-a bukwa ẹkpiri okpoga bẹ kparu iphe, ẹphe shisweru ọzo ono, pfuru nhamunha ono; bya emeahaa iphe ono, Belamu meru teke ndiche ono. Mbụ o buru gẹ Kora kwefuru Chileke ike bu g'ẹphe wataru ememe. Ẹphe jekwanu ala l'iswi g'ọ laru. <sup>12</sup> Ọobujeru; ẹphe -bya anọ-kube unu; eri nri l'eka unu dokoberu tugba nri eri gude egoshi l'unu yeru nwibe unu obu; ẹphe aburu iphe-iphere nodu l'echilabo unu. Ophu iphere onwophe adujedu phe; l'o buẹpho onwophe bẹ ẹphe letaru ẹnya. Ẹphe du g'urwukpu, pherephere zikashiru; egube-a igwe erwuchaa erwurwu; pherephere ezikaa ya; igwe te edzeedu mini-a. Ẹphe du g'oshi-omi; ole o kwa ophu ata amijedu mebyi teke o gbaru iya l'amị mebyi. Egube ndu ono bẹ onwu gbuwaru l'onondzu; o to buledua akpo anwuhu lanu bẹ ẹphe nwuhuru; noo kele e phefuwaru phe tuphaa

g'eephefuje oshi-a. <sup>13</sup> Ẹphe dukwapho g'akparamini, ha shii, l'atụ l'eze-enyimu. Noo kele ẹphe aphukpotaje ejo umere, rehuru erehu ono, ẹphe eme ono g'ẹka uphu mini bulihuru. Ẹphe du ge kpokpode, ephu ụzo. Ọle ẹka Chileke doberu kwaberu phe bukwanu tsukiribaa ẹka agba ejo ochii. Ọ buru ẹka ono be ẹphe a-nodu jasụ le tuutuutu le mimiimii.

<sup>14</sup> Ọ kwa Inoku, bu onye ogbo k'esa l'eri Adamu be pfuru mpfuchiru ke ndu ono su: "Unu lenu; Nnajiuphu be yee ndu nkiya, du unubuku ugbo iri shikwa l'imigwe swiru abya; <sup>15</sup> g'ẹphe bya ekpee ndiphe g'ẹphe ha ikpe. Oogoshikota iphe, bu ndu ono, ata madu Chileke ono iphemiphe, ẹphe meru iya, bu iphe-aji; l'ogude emeswe ono, ẹphe mesweru iya ono nmaa phe ikpe l'ẹphe ta akwabeduru iya ubvu; bya anmakwa phe pho ikpe iphe, bukpo ejo opfu, ẹphe gude pfubyishia epha iya."

<sup>16</sup> Ndu ono abujeru; iphe -byaru phe; l'ọ buerupho Chileke be ẹphe anoduje ata uta iya; mbu-a; iphe -byaru phe; ẹphe agbe wata aguru Chileke aphu iya. Ẹphe eworu onwophe togboru egu ejo-iphe, agugbabe phe nu. Iphe, eshije phe l'onu buerupho aja onwophe mkpokoro ajaja. Ẹphe -humakpowa l'o nweru urwu, ẹphe e-rita nemadzu l'eka; ẹphe ajakposhikpoepho onye obu.

### *Anma okwa me iphe, ee-meje*

<sup>17</sup> Ọle o bu; ndu mu yeru obu; iphe, mu eme g'unu maru bu; unu nyatajephho iphemiphe ono, ndu-ishi-ozu Nnajiuphu anyi Jizosu Kereshi

vuhawaa ụzo pfiaru unu ono. <sup>18</sup> Mbụ iphe ono, ẹphe shi anọduje aguru unu l'ọgu ebvu ono, bụ iya bụ: "L'o -rwujeepho teke mgboko-a l'a-bvụ bẹ o nwechaaru ndu a-nọdu aja unu ewenu. Iphe, ẹphe a-nọdujeepho awoko ẹka iya bụ g'ẹphe e-shi mee iphe, ẹgu iya enwu pẹ phuruphuru l'ẹhu; mbụ iphe, ẹgu iya agụ pẹ; opfu l'ẹphe ta akwabedu Chileke ụbvù."

<sup>19</sup> Ndu eme ẹgube ono bẹ l'akpatajẹ g'ogbo bua onwophẹ ẹbo; wata akpa iche iche. Ọ kwa ẹgu iphe, dū lẹ mgboko-a, l'agụ pẹ nū bẹ kpụ pẹ l'ẹka; ọ tọ bukwa Unme-dụ-Nsọ gude ndzụ pẹ. <sup>20</sup> Obenu lẹ-a; unubẹ ndu ọphu mu yeru obu; unu pfiẹkwarupho pfiushia ike l'ekwekwe ono, dū iche ono, unu kweru ono; mbụ ekwekwe ono, shi Chileke l'ẹka ono. Unu gude ekwekwe ono vuje evuvu. Unu hajẹ gẹ Unme-dụ-Nsọ goshije unu g'unu l'e-gudeje epfu anụ Chileke. <sup>21</sup> Unu nọpyabeekwapho lẹ nyemobu Chileke; unu anọdukwapho ngaberu Nnajiuphu, bụ Jizosu Kéreshi g'ọo-phuaru unu obu-imemini; mekwaapho g'unu nọdu ndzụ oje-joje.

<sup>22</sup> Unu phujekwaru ndu abokwadu obu ẹbo obu-imemini. <sup>23</sup> Ẹgube ndu ono bẹ unu e-yetajeru ẹka; lọfuta pẹ l'ọku. Unu aphujekwaru pẹ pho obu-imemini; mbụ ndu ono, bụ ẹgu ejo-iphe agụ pẹ nū bẹ gude ndzụ pẹ ono. Ọle-a; unu ta akwaswejekwaru pẹ ẹnya mẹ unu -nọdu aphuru pẹ obu-imemini obu. Iphemiphe, bụ nkepẹ bẹ unu a-kpọkotajekwa ashị; mbụ je akpachaa l'uwe, ẹphe eye l'ẹhu, bụ ọphu ẹphe gudewaa ejo-

ememe p̄hẹ pharw̄ushia.

*Ajaja b̄u kẹ Chileke*

<sup>24</sup> G'anyi tua Chileke ẹpha; mb̄u onye ono, a-d̄u ike gudeshia unu g'unu ta ada; t̄eme ọ b̄ukwaru iya ph̄o l'e-me g'ọ t̄o d̄u iphe, aa-ta unu ụta iya teke oo-kuta unu dobe l'ọdu-biribiri iya. Eka ono b̄u ẹka ẹhu a-n̄odu at̄s̄owaro unu ụtso.

<sup>25</sup> G'anyi tua ya ẹpha l'ọo ya kpoloko k̄p̄eekpu b̄e b̄u Chileke. Ọ b̄uru l'ẹka Nnajiuphu anyi, b̄u Jiz̄osu K̄éreshi b̄e oo-shi dz̄oo anyi. G'ọdu-biribiri m̄e ab̄u Ọkalibe, kangoru n̄u; m̄e ike; m̄e ab̄u ishi, b̄uhakpoda nkiya t̄eme mgboko d̄u; b̄uru nkiya nta; b̄ukwarupho nkiya jas̄u l̄e tuutuutuu l̄e m̄imiimii. Nokwa g'ọ d̄u.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d